



केशरमान ताम्राकार
शिकागो

हलिमय् नेवाः व नेवाः भाय्

नेवाःत उपत्यका दुने जक सीमित मखय् धुंकल । नेपाःया पूर्वया मेचीनिसँ पश्चिमया महाकालितकया थी थी शहर व गां गामय् नेवाःतय्सं बास यानाच्चंगु दु । थःपि गन गन वन, अन अन नेवाः दयकाः चंगु दु । गनं गनं ला यँया थी थी त्वाःया नांयात स्थानीय रूपं नालाकयाः यँया त्वाःयात जीवन्त यानातःगु दु । अथे हे नेपालभाषा नं ल्हानाच्चंगु दनि ।

थौं नीछगुगु सदी वयाः हलिंया दक्व धैथें थासय् नेवाःत थ्यने धुंकूगु दु । न्हापा न्हापा जूसा आखः बनेगु त्वह तयाः विदेशय् थ्यनी । तर थौकन्हय् थी थी हुनिं यानाः थः जक मखु माचाछि नेपालं मेगु देशय् बाय् हिलाच्चंगु दु । अप्वः धैथें नेवाःत बाय् हिलावंगु थाय् धइगु उत्तर अमेरिकाधाःसां पाइमखु । जि नं थौकन्हय् छँजःपि नापं अमेरिकाया शिकागो शहरय् च्वनच्वनागु दु । न्यनाकथं दकलय् न्हापा सन् १९७६ स शिकागोय् भाःम्ह नेवाः खः - भाजु मदन राजभण्डारी । अनं लिपा वय्कःया तिरिमय्जु धर्मदेवि 'यमि' राजभण्डारी भायाद्युगु खः । थौं वया अमेरिकाया अप्व धैथें राज्यय् नेवाःत थ्यनेधुंकल । अप्व धैथें अमेरिकाय् च्वनाच्चपिं नेवातसें बाबांलागु थासय् च्वना ज्याजक यानाच्चंगु मखु व्यवसाय नं बांलाक न्ह्याकाच्चंगु दु । अले थवंथवय् नेवाः भाय् नं ल्हानाच्चंगु छगूकथं मांभाय्प्रति माया मतिना यानाच्चंगु यच्चुक सी दु । इलय्बल्य नेवाःतय् दथुइ मुनाः नखःचखः हनेगु नं यानाच्चंगु दु । थुकथं नेवाः नेवाः दथुइ थवंथवय् ग्वहालि व थःगु भाय्, तजिलजि, नखःचखः ल्यंकातय्त् नीन्हय्दँ न्हयः अमेरिकाया वासिङ्गटन डिसी 'नेपाः पासा पुचः अमेरिका' नामं नेवाः पुचः नीस्वंगु खः । थ्व धुंकाः व हे थासय् थनिं भिन्त्यादँ न्हयः मेगु नेवाः संस्था 'नेवाः अफ अमेरिका' जन्म जुल । थ्व निगुलिं संस्था नेवाःतय् भाय्, तजिलजि, नखःचखः, संस्कृति अमेरिकाय् म्वाकातय्गु नितिं तःधंगु भूमिका म्हिताच्चंगु दु । 'नेवाः अफ अमेरिका' अमेरिकाया मेमेगु राज्यय् नं कचा स्वना यंकूगु दु । आःतकया दुने न्यागू च्याप्टर स्वने धुंकल । अथे हे च्यादँ

न्हयो शिकागोय् 'नेवाः अमेरिकन दबू' नामं मेगु नेवाः संस्थाया स्थापना जुल । थुगु संस्थां नेवाः भाय्, तजिलजि, नखःचखः, संस्कृति लिसँ नेपालभाषाया साहित्य व साहित्यकारपाखे नं मिखा तःगु दु । दकलय् न्हापा नेपालभाषाया उपन्यास नेपालं पिने पिथनेगु ज्याया शुरुवात शिकागो जूगु दु । अथे हे नेपालभाषाया साहित्यकारपिनिगु बुदिं न्यायकाः साहित्यकारपिन्त म्हसीका बीगु नं ज्या याःगु दु । आः वयाः अमेरिकाया थी थी राज्य पोर्टलायन्ड, टेक्सास, बोस्टन, न्यूयोर्क, डेन्भर, फ्लोरिडा, क्यालिफोर्निया व मेमेगु राज्यय् नं नेवाः संस्था स्थापना जुइधुंकूगु दु । थुकिं छु सी दु धाःसा भी नेवाः जातितय्गु तजिलजि, नखःचखः, संस्कृति तनी मखुत ।

'भाषा म्वाःसा जाति म्वाइ' महाकवि सिद्धिदास महाजुं धयादीथें नेवाः जाति म्वाकाः तय्या लागी भाय् नं म्वाकेमाः । गन भाय् मदइ अन जाति दइ मखु । भीगु दकलय् न्हापांगु पहिचान धैगु हे भीगु भाय् नेवाः भाय् - नेपालभाषा खः । गन भी थवं थवय् नेपालभाषा मल्हातधाःसा भी नेवाः खयां नं नेवाः मखया बी । थौकन्हय् अप्वः धैथें नेवाःतय्सं नेवाः भाय् मल्हासे खय्भाय् ल्हाना हयाच्चंगु भीसं खनाच्चनागु दु । नेवाःतय् छँखा छँखाय् नेवाः भाय् मल्हाःसे खय्भाय् ल्हाय्गु फेसन दुत हयाच्चंगु दु । थुकिया जिम्मेदार सु खः? अक्सफोर्ड युनिभर्सिटीया प्रोफेसर भाजु डा. डेभिड् गेल्लरं थुकियात कयाः च्यूता तयाः धयादीगु दु 'थथे हे जुया वनधाःसा मेगु ५० दँ लिपा नेवाः भाय् ल्हाइपि माले माली ।'

भाय् भाय् धकाः दबुली दनाः नेवाःभाय् म्वाकेमाः धकाः तःसलं भाषण बियादीपि नेवाः न्हयलुवातय् छँय् नेवाः भाय् मखु खय्भाय् ल्हानाच्चंगु दु । नेवाः भाय्या सफू च्यादीपि साहित्यकारपिन्सं थः मस्तलिसे खय्भाय् ल्हानाच्चंगु दु । नेवाः भाय् थपू याय्या नितिं थी थी नामं नेवाः संस्था चाय्का जि नायो, जि न्वकू, जि छ्याज्जे, जि दांभरि, जि मू दुजः धका न्हाय् तपुकाच्चंगु दु । छु इमिसं नेपालभाषां प्रचार प्रसार याय्गु ज्याय् थःगु छँय्

छ्यलाच्चंगु दुला? नेपालं पिहाँ वया: अमेरिकाय् व हलिया
थी थी देशय् नेवा: संस्था स्वना: जिं नेवा: भाय्या लागी
स: तया च्वनागु धा:गु संस्थाया पदाधिकारीतसें थ: मस्तलिसे
नेवा: भाय् ल्हानाच्चंगु दुला? थ्व छगू न्ह्यस: ख: ।
नेवा: मां अबुं जिमि मस्त अमेरिकाय् च्वनीपिं ख: ।
नेपालय् लिहाँ वनीपिं मखु इमित नेवा:भाय् छाया माल धका:
नेवा:भाय् मल्हा:सें अमेरिकन भाय्, खय् भाय् ल्हाई । थ्व
छगू इमिसं त:धंगु गल्ली यानाच्चंगु ख: । थ:थ:म्ह त्वाकलय्
तया: पालाच्चंगु दु ।

थुगु च्यूता: मात्र च्यूता:जक मखसें नेवा:त न्हनी धइगु च्यूता:
ख: । छम्ह नेवा: मखुसां गेल्लर भाजुं नेवा:तय्त कया: गुगु
च्यूता प्वंका: दीगु ख: उकियात कया: नेवा:तय्सं वा: चाय्के
हथाय् जुइ धुंकल कि - जिमि मस्त नेवा: ख:, जिमि मस्तसें
नेवा: भाय् सय्मा: । नेवा:भाय् हे इमिगु पहिचान ख: । न्ह्यागु
देशय् च्वंसां नेवा: जि ख: धाय्गु ख:सा । थ:गु भाव थ:
मस्तलिसे थ:गु भाषां नवाय् बलय् गुगु आत्मीयता दइगु ख: मेगु
भाषां खँ ल्हाय्बलय् गुबलें दइमखु धइगु वा: चाय्के मा: । अथे
हे, थी थी नेवा: संस्थां इलय्बलय् न्ह्याकावयाच्चंगु ज्याइव:
नेवा: भाषां मयासे खस भाषां यानाच्चंगु नं भीसं खनाच्चनागु
दु । भीगु ज्याइव: नेवा: भाषां मजुलधा:सा व ज्याइव: भीगु
ज्याइव: मजुल । गन नेवा: भाय्या सवा: काय् मखनी व
ज्याइव: नेवा: भाय् थपु याय्या लागीं जूगु ज्याइव: मखु धइगु
वा: चाय्के मा: । नेवा:भाय् मथूपिं नेवा:त नं दु धका: छम्ह
निम्ह पदाधिकारीतय् जिद्धिं मुक्कं ज्याइव: हे भीसं खसकरण
यानावयाच्चनागु दु । गुकिं याना: ज्याइव: जक नेवा: मेगु
दक्कं खसभाषा जूवनाच्चंगु दु । छु थुज्व:गु पहलं भीगु भाय्
या विकास जुइला? थ्व खँय् नं नेवा:तय्सं वा:चाय्केमा:गु
आवश्यकता बलंगु दु ।

नेवा:तय् सन्दर्भय् दँय्दसं न्हूदँ थ्यनकि नेवा:त चंचं
धाइ । भ: भ: धाइ । हलिया थी थी थाय्या नेवा: जक
मखसें संघ संस्थां नं त:जिक न्हूदँ हनी । म्हपूजा याइ ।
थ्व छगूकथं नेवा: सभ्यता प्रति गर्व ख: । नेवा: सभ्यता
सुलाच्चंगु थुजा:गु ज्याइवल्य् ब्वति का: वइपिं भाजु मयजुपिं

जक मखु मस्तयत् नं भ:भ: धाय्क नेवा: वसतं छायापिया:
न्ह्यब्वइ । दबुली नेवा: म्ये हाली । नेवा: म्येय् प्याखं ल्हुइ ।
नेवा: भव्य नइ । इव: भव्य याइ । फोटो सेसन जुइ । पत्र पत्रिकाय्
तत:ग्व:गु आखलं बुखँ पिदनी । फेसबुक जाय्क ज्याइव:या
किपा स्वइ । लाइक वइ, कमेन्ट वइ । तर थुकी नं छगू बिचा:
याय्बहगु पक्ष दु व ख: भीगु सभ्यताया चिं न्हूदँ थुली जक
सीमित जुइगु ख:ला? धका: । अन ब्वति का:वइपिं नेवा:तय्सं
नेवा:भाषां कालबिल यानाच्चंगु दु मदु भीसं बिल्कुल वास्ता
यानाच्चंगु मदु । अफला नेवा: भाय् ल्हाय् सयां नं थ:गु मांभाषं
खँल्हाबल्हा याय्गु सिबें खस भाषा वा अमेरिकन भाय् छ्यलेत
हथाय् चायाच्चनी । छु थुकिं भीगु भाय्या विकास जुइला?
थ्व छगू नं बिचा: याय्मा:गु पक्ष ख: ।

इमान्दार जुया: खाइसेच्चंगु सत्ययात पित हय्गु ख:सा नेवा:
वा नेवा: खल: पुच:तय्सं ग्वसा: ग्वयाच्चंगु नेवा: सभ्यतालिसे
स्वापू दुगु ज्याइवल्य् न्हू पुस्तायापिन्सं अमेरिकन भाय् हे
जक ल्हानाच्चंगु दु । नेवा:तय् न्हूदँ, नेवा:त जक मुनीगु
नेवा: ज्याइवल्य् थ:गु मांभाय् मल्हासे मेगु भाय् ल्हाय्गु
धयागु भीगु सभ्यता भीसं हे न्हंकेत लालायित जुयाच्चंगु
मखुला धइगु न्ह्यस:चिं दं वइ । उकीसनं गुलिखे नेपालय्
च्वनाच्चपिं भी नेवा: दाजुकिजापिन्सं विदेशय् च्वनाच्चपिं
नेवा:तय्पाखें भाषा संस्कृतिया नितिं छुंकथं ग्वहालि याइला
धइगु आशा दु, विदेशय् च्वनाच्चपिं नेवा:तय्सं नेवा:
सभ्यतायात कया: छुं चिन्तन याइला धइगु भावना दु । मांदेय्
नेपालय् च्वनाच्चपिं नेवा: दाजुकिजापिन्सं या:गु आशा वा
भावनायात भीसं कुठाराघाट यानाच्चनागु मदुला धइगु धारणा
नं थन दं वइ । उकिं नेपा: दुने वा नेपा: पिने जूसां
नेवा:तय्सं थ:गु ज्याइव: न्ह्याकेत तत्काल त:त:धंगु कल्पना
वा ज्याइव: मन्ह्याकूसां छाती ल्हा: तया: नेवा: भाषं ज्याइव:
न्ह्याकेमा: । थ्व धुंका: तिनि मुक्कं सभ्यता उत्थान याय्गु
निति मेमेगु ज्याइव:त न्ह्याकेमानि धइगु वा: चाइ । अफ भीगु
सभ्यताप्रति भीसं गर्व याय् सइ । उकिं दकले न्हापां भीसं
थ:, थ:गु चाक: दुने नेवा: भाय् ल्हाय्गु परम्पराया विकास
याय्फतधा:सा भीगु सभ्यताय् हाकनं छक: चुलि जाया: वइ ।
भी भूगोल न्ह्याक्व तापासां भीगु पहिचान जहाँ थी ।



न्हापांगु हलिं नेवा: सम्मेलन भ: भ: धाय्के नु

